

進賢縣志卷四

建置 倉廩

常平倉五處

一大堂西廊倉計廩五間

一二門內西倉計廩八間

一早塘倉計廩二十六間

一義學倉在忠毅祠側計廩十二間

以上四處乾隆二十二年知縣張若翼詳請修理

咸豐七年俱被賊燬

一西門內倉計廩十二間

此倉乾隆十三年知縣向德一請動用捐監倉費銀兩建造

進賢縣志

卷四

建置

一 戊戌補刻

以上五倉共貯額穀貳萬肆百叁石肆斗捌升肆合柒勺

以上羅志

舊社倉三十六處

三十六倉俱萬厯間令黃汝亨建其實粟之法首捐贖次

勸義民小訟願息輸石斗者聽每年擇忠實里保二人董

其事官置簿三扇一付見役一付役過一存縣縣官按簿

稽查或時不意親臨之無差官查盤之擾春夏交出貸小

民徵息加二遇歉歲則徵本暫免息水旱甚設法施賑先

本社次外鄉又於本社擇一人看守每年給勞穀四石頗

稱善政然未行數年並廢也

羅志

金廷璧社倉議曰古常平義倉豐時積之無賤價傷農

之患歉時散之無閉廩騰價之憂誠爲千古良法進舊設五倉在邑曰常豐在鄉有東西南北四倉環一縣之民待命焉然鄉市遼隔遠邇偏枯勢所必至後總實于常豐一遇水旱移粟則轉委假手因緣爲奸移民則民從百十里外忍饑裹糧而至竟日不得一粟而市井吏胥詭屯插和反充若輩橐此已事之明鑒也令黃公汝亨熟悉茲弊除常豐倉邑社倉外復立各鄉都倉三十六所夫亦曰以本處粟濟本處民以各都人辦各都事而官第爲核其數當青黃不接耕耨無資時小民不苦稱貸富兒亦不得閉糴橫索焉乃行之不數年輒廢者

進賢縣志

卷四

建置

二

戊戌補刻

有治人無治法自古記之舉而行之無不望于當事者
舊社倉一十七處

城內社倉一間在常平倉側 一都二都三都四都倉四間
在錦繡坊 五都六都七都倉三間在鎮頭嶺 上八都下
八都倉二間在七里岡 九都二十六都倉二間在趙家鋪
十都十一都十二都倉三間在陂頭村 十三四都十五
都倉二間在鯉潭所 十六都倉一間在南臺集 十七都
十八都二十二都上倉三間在鍾陵集 二十二都下倉一
間在鹿塘村 二十三都倉一間在梅莊集 二十四五都
倉一間在莊上村 二十七都二十八都二十九都倉三間

在白鶴山 三十都三十一二都倉二間在黃坊村 三十一
三都三十四都倉二間在羅溪集 三十五都三十六都三
十七都倉三間在玉嶺 三十八都倉一間在朱坊村以上
羅志
各倉久廢

以上十七倉係乾隆七年巡撫陳宏謀奏請各州縣廣建
社倉其本穀卽于該地方常平倉內酌借俟收息穀贏餘
照舊歸款進賢縣原本穀六百九十九石六斗是年詳請
常平倉動穀一千四百石四斗添撥社倉以作本穀二共
本穀二千一百石至乾隆九年歸還常平倉穀一千四百
石四斗息穀存留各都作本乾隆三十二年奉文建設社

進賢縣志

卷四

建置

三

倉變賣息穀九百六十四石二斗六升三合五勺乾隆四
十五年奉文變賣社倉息穀九千二百七十石五斗七升
五合解司充公尚存本穀三千六百一十一石四斗八升
九合九勺乃日久弊生彼此挪移前後虧缺以致空虛社
正徒抱空籍莫可如何有司歲取具文上下相遁又每歲
撥變息穀間里騷然傾家蕩產指誣善良僅僅完案今此
穀無存已三十餘年朱子所云聚可食之物于鄉井荒閒
之處而主之不以任職之吏取之不以徒流之刑苟非得
聰明仁愛之人又得忠信明察之士相與并心一力以謹
其出納而杜其奸欺則其法之難守不待已言而見者也

水次漕倉在省城進賢門外廩屋五十四間府志明萬曆二十

六年知縣黃汝亨建縣志咸豐三年兵燹無存

邑人樊兆程記我國家歲漕百萬之粟以實邊儲計卒食脚
運之耗不啻三致一也再計水衡金錢之費不啻十致一也
若析計郡邑頭會箕斂種種費出無經不啻二十致一也夫
軍國有必藉之需民力有一定之額浮於額之外者何益於
國祇重病吾民耳以吾歷觀東南郡邑漕粟之額外病民者
比比皆然但有甚不甚焉我進邑之漕粟踰額叢蠹傲也甚
矣進邑與南新均錯壤而治南新儲漕粟以庾進邑儲漕粟
以舟儲以庾者粟之數可核粟之顆勿壞粟之輸甚便粟之

出納無敢高下其手儲以舟者粟以無防而耗粟以近水而
潤粟以色不稱而起旗軍之刁難粟以船蕩漾而致稱量之
不平又其甚者有風波之險有守候之苦有盤剝之需勢不
得不僉富有力者傾兌名曰解頭里遞任徵解頭任兌三十
八都各一人焉彼在風猶則藉名目肆科索若村保慮民畏
旗卒如虎視赴兌若赴戍賣屋賣田賠冗費惟以得蚤脫苦
役爲快勢又不得不雇巨艦艦頭倍索募資肆行侵漁更因
緣旗軍強半分利解頭莫敢誰何大率計每年滛耗外交兌
諸浪費及搪量高下其手者船頭公取竊取一切無名莫算
者銀不下二千兩有奇米不下二三萬斛而嚮所立縣鎮三

倉煩擾疊累及衙役市僧以爲奇貨而吞食之者又不可數計也會一邑額米二萬六千有奇而額外浮冗之費幾半之鍾陵編戶屋三萬四千耳貧而赤立者什之八九有中人產者什之二三其富有力者百不四五也每歲傾三十八戶而幫運津貼者又不啻數十戶歲計傾害者村相望無一歲而不漕則無一歲而不害民安得不十室九空轉徙相仍也哉前令恤其事或有議賃倉囤兌者或有請移船就鄔子交兌者竟格而難行今我武林黃令君以己亥來涖我邑孜孜詢民間疾苦次第具白於當道尤於漕運一事進父老訪縉紳羣子弟而備詢之咸以狀聞謂必有倉儲而後可甦民累也

進賢縣志

卷四

建置

五

戊戌補刻

令公曰烏可緩時庚子六月天溽暑令公不避星馳抵水次擇便利得庾部之石有故叅戎第修梁傑構堅礧崇墉向東而西縱一百七十尺而橫半其縱之數買直比創費省十之六衆咸曰便於是召集闔邑鄉遂坊市之民計財慮役萬姓謹呼挾鉢兩祈成事思得廉幹者任之敦請余族兄州牧灼董其役分而佐理者八人若古昔重三老之義媿媿爲民請於上臺咸報曰可卜鳩工庶民子來澆者易之頽者築之卽舊爲倉者二十三間創新爲倉者六十一間每部各一倉以便收兌廳事之左量斛翼室庖廚等房以便糧衙居憩且可省先年解役賃屋重費也凡用木之千六百章瓦璧約墜

鐵石之用稍異計費九百兩有奇經始萬曆二十八年七月
越三月工完而運艘鱗鱗至矣值歲當羣吏入計令公且行
且倦倦調停一切事宜與我民約曰草去倍徵之議桶一以
官斛爲準毋申困我民爲也里遞各備水隨便抵水次上倉
卽返毋久守候爲也批頭於鄉隅中選僉十二名守兌各里
遞量爲幫貼毋仍先年疊累爲也又言之上官曰改水兌爲
倉兌則核解贏米請減以抵脚費也解兩旣革民無煩役旗
軍亦輪伍接單請毋以什五之衆重擾也時制臺仁吾夏
公太府常鶚陳公咸雅志爲地方興除得悉遂所請地官尙
書郎如愚俞君監督兌政持廉釐弊軍無敢譁民咸稱便我
邑倉兌創始尤藉彈壓均劑之力居多民相與尸祝之以識
不忘是歲無插換無泄爛散酒至於無籌淋尖樣米畫會
頭舵夙例諸無名費槩多減約令公以辛丑夏月復任鍾陵
悉心嚴覈有餘米有剩費計是歲汰省比先年濫溢者不啻
什百一一申白之著爲例我邑利賴寧有旣耶邑人漑公之
澤思勒鴻休垂永遠相率請記於程予惟弊不太甚無容速
去法不稱便難以強民我邑數百年水兌茶瘁甚病吾民莫
不以立倉爲便合君斷然行之剔苛除煩而民不以爲驟舉
羸役衆而民不以爲勞惟時丁壯安於田里耄倪歌於道路
且也令君自邑甫二載其吏生我民率多異政日者南兌之

節縮屠置視漕兌所省舉相半也鍾陵何幸而獲逢令君也哉昔呂文靖不稅農桑一事耳王文正公且謂其能重民事達治體而知其必與沂公並相我令君諸凡擘畫靡不便民識體而不爲旦夕計也者其他日鴻巨事業洵可必也矣余願與士民拭目俟之令君名汝亨字貞父號寓庸浙江仁和人戊戌進士

附漕兌議

進賢省倉作者苦心良法鉅細畢當十數年而後寢非其初殆有政息人亡之感焉爰備述當年文移條議以存故實志南昌府進賢縣爲懇恩俯順民情比例省縣議立兌准官倉

以蘇極困垂永利事萬曆二十八年五月二十二日據通縣坊里王家讓何邦謐等連名具呈前事內稱進賢土壤接近南新制產同種輸運同道惟南新有倉兌之利獨進賢遭船兌之害每年起運之時值冬乾水涸積年大船戶包寫船隻駐樊西港三陽等處長短小船駕路逆流盤運看守不全恣意偷盜插和穀碎等齊衆米停畱日久濕潤漸生錮弊難革更有風波之險糶粒難存臨兌掛籌動被旗軍刁難卒難措辦只得重利揭債認賠傾家蕩產十斛九乏苦已極矣今衆自備民財買地建倉葺喻大船而濕潤插和故弊可除懇乞申文等情到縣本年六月初八日又據本縣鄉宦樊兆程雷

夢麟江和饒位徐應鶴陳維春等舉人黃誥何允清等虞增
附生員徐學詩舒一桂等具呈前事內稱本縣民以瘠土困
踣病加兌役疲斃山城非澤國之區冬月漸流如綫長江離
水道之遠運米梯航難通必假小中船兩遞而至巨艘故遭
大船戶百弊而恣侵漁不惟風波之險驚心疲役取困水穀
之播藉口旗軍小民業痛口食脚耗之艱上運何堪掛籌浦
負之苦鬻兒賣女蕩產傾家若不絕去其弊源何由頓起溝
壑惟南新設有分倉軍民安堵獨進賢原未創建耗損無休
幸遇睿慮國計軫念民艱乞允建倉之議以刷宿垢冀申宜
民之策大邑仁風則倉自民創歲省妄費數千金米不船兌

利益疲民千百世等情本年七月初二日覆據通縣坊里王
家讓何邦謐等呈乞申文建倉兌草船運急解民懸事內稱
本縣糧解年換船戶積慣欲自看守難防盜竊只得包裝恣
意插和緣因假手隔目事不由已致使軍旗刁勒有名倉兌
一立舊弊悉蠲前月泣訴天臺蒙恩允情衆等自備民財買
地建倉見有南昌居民熊偉置有水次便倉一所愿賣貯兌
憑衆定價議買卽今兌運在邇讓等勢急湯火愿各損貲速
成救痛呈乞速申建倉草船裕國蘇民等情到縣據此看得
通縣坊里王家讓等鄉宦樊兆程等及通學生員徐學詩等
再三呈懇所據卑職識淺未敷正體力綿無救民艱豈不切

治貴無事法在安民顧有民所自起而順之爲安事有樂成而動之爲靜不憚一勞而貽永逸則今日之水次倉兌是已竊照進邑東南皆山瘠之土西北多水潦之鄉疊賦繁差編多派重已不堪命而淮兌之苦尤不忍言緣無水次官倉以致雇船搬運故每年有解頭賠累之困有里遞轉運之煩有小船大船搬移虧折之苦有旗軍藉口船裝濕潤刁尅之害是南新立有便民官倉不僉解頭者約每年多費米以三五千石計銀以千餘兩計而至於民間之計脫解頭里遞之弊詐人戶積年保歇船戶通同包攬科派之費更不可算俱由一倉不立百害叢加富至罄竭貧至流亡年復一年困之又

困而卒悠悠歲月未遑議成者固非官不恤民亦非民不罷便緣時未極敝則隱忍莫言地無便倉則工費爲鉅民難處始事且因仍今據鄉宦樊兆程等里坊耆民王家讓胡尚義等呈稱前事極訴無倉船兌之積苦與見有南昌縣民焦澤契賣自置住居便倉一所在於本省交兌水次用價見其不過七百金而整舊如新營度之費不過三四百金計闔邑照米派出者不過千金而所省銀米三四千有奇目今所費者僅抵一歲之半而每歲之亨利瀾害不啻億萬之多誠爲一勞永逸進民萬口之便卑職猶恐迹涉紛更顧慮首尾石集父老商兌不寧而合邑都圖坊里之民富者挾銖兩資者持

分釐謹呼同聲風湧雲集倉費倉傾移時而成此非卑職真有憫恤之實能致其子來亦由進民不堪湯火之中自救其頭目卑職猶尚狐疑不決稍待歲時顧念日今淮兌不遠萬民輸赴已同若違時失衆後聚爲難邀簡靜無事之名造棄利貽害之罪又不忍爲然情自下通恩由上造非卑職一人所敢擅便又查得南昌新建奉新三縣見蒙兩院司道允行倉兌事例萬姓銜恩進之赤子諒蒙一體同恤爲此不避賤愚謹將本縣船兌耗費若干與設立官倉交兌省費若干及見買屋整造若干逐款開列伏乞俯賜照察施行撫院夏按院喬糧道沈各批允

南昌府進賢縣爲申明倉規益民省費懇批定則以便世守事竊照往昔水兌使費浩繁會近千金本縣軫念民瘼已經申請條議免僉解頭以省浩費建立官倉以便交納各款緣由于萬曆二十八年七月十五日通詳兩院司道外卷查隨奉撫院夏批據本縣申同前事奉批建倉交兌便民居多仰行該縣照議舉行繳奉此又奉按院喬批據本縣請同前事奉批倉兌旣便於船兌卽如議建造運兌繳奉此該本縣遵照批示遵行外所有建倉兌過省費銀米數目并遵行事宜該本縣剔心詳查立倉交兌事務較之往昔水兌軍旗藉口溼潤議單外有灑倉槩米無籌之索大船戶有口食撥撒之

需每兌米則一石外增補解頭費米一斗今始倉兌亦難盡
除故本縣議處每米一石止酌米六升以備兌費緣因原經
申請移船米二升行槩多米四合改抵入倉出倉夫脚之米
致蒙糧道牌行建昌府蕭通判同運糧蕭把總會議已經復
申批行准改詎意刁軍弊聳矛盾前後文移是以二升四合
之米未蒙允除則於本縣酌米六升之內又被旗軍措去移
船及無籌等米是旗軍兩獲其利經解疊受其虧請爲原其
履歷再造鴻庥憫痛進邑疲民大普陽春化育詳查本縣原
經申請移船改抵脚費之米乞賜允行庶民無外增之耗俾
羣黎沾其全惠而鈞臺造福生靈利及萬民矣及查往昔解

頭用大船載米水兌則有大船錢及旗軍雜用使費每石總
會五分動以千計蒙允建倉兌簡僉批頭十二人則免解頭
四十餘名蠲除百費每兌一石今只用公費銀一分此以內
軍旗之兌用糧官批頭之口食遠運之扛解罪贖紙張等項
悉皆取足於此此皆中正簡便是宜米有贏餘爲此合行申
請報聞懇賜矜憫下情昭布軍民定則使進民世爲遵守則
倉兌動有成憲加惠元元其利溥哉所有立倉已行益民省
費事宜逐一開列詳報俯賜批示允定倉規今備前由具申
伏乞照詳施行

一請省僉解頭定僉批頭以清兌務切照官倉不立勢不得
不船運水兌人戶交納里遞催赴解頭中間道里遠近糧米
多少不同不得不零星類齊運至本縣三倉收貯委官驗完
然後大船運至漳江水次聽兌於是守候之苦風波之險耗
折侵蝕之虞上下浩繁之費軍兌刁難之害皆解頭一身肩
之故每年值甲人戶聞僉解頭如驅赴湯火富者計資緣以
幸免貧者曾不得塗足而收半穗平則互爲幫貼強且恣意
科派通縣三萬四千三百二十五戶旣輸米完官又賠米疊
役十室九虛無不疾首不貲之費百千無紀若照南新設立
官倉則各都圖竟可從便運至倉所糧官驗米交兌而解頭

可無僉重困可立甦矣前件該本縣看得往年僉解頭四十
餘名今建立官倉止僉批頭一十二名令其在倉凡經催運
米到倉糧官在倉驗收數目本縣印發簿票給與批頭止令
查收登記某都某圖經催上倉兌米若干石明白記籍發票
給與經催執票赴縣登簿稽查完欠令立倉後苦樂均沾貧
富並利豪強無兼併之謀貪暴無多取之害遵蒙允行外乞
賜批示永爲遵守

一省船兌浩費切照南新催米一完各雇小船運至水次入
倉官驗之後固封候兌何省便也進賢獨雇大船者其所由
每年各里遞零星催米各用長短船隻寫路搬運水淺灘乾

又必搬剝分駐集樊西三陽等處聽候糧官驗完然後解頭運至漳江水次聽兌夫糧米入倉數各盈幾千勢不得不雇大船守候水次慮有風浪亦不得不雇大船於是積年大船戶包攬侵漁不可勝言每石船銀二分計通縣漕糧二萬五千五百餘石共費雇船銀五百一十餘兩上米之時淋尖插塘口食神福之米約幾二千上米之後插穀換米爬偷撒灑之米約幾二千餘而風濤滄爛之患搬剝之費不與焉則此五百餘兩金二三千石米從何而辦秋毫顆粒盡民膏血也既有官倉以後惟照南新定例各里經催隨便雇船搬運至省上倉卽不能保無搬剝風波而前項船戶額外之費爛濕漏偷之虞一切可免矣

一省兌軍繁費切照進賢接壤南新轉輸同道兌米之法漕糧加耗副米與南新之則相同至脚耗米南新止三升進獨三倍此未敢遽請改減惟是倉兌不立往用船兌議有移船就船米每石二升計二萬五千米多至三五百石南新倉兌議單每正副百石只加無籌米一石進賢無倉兌成八十三四石計二萬五千漕糧又多兌米一千五百三十餘石至於積攬船戶通同旗軍久延不兌捏稱濕潤刁難解頭被其措索尚虞殃禍無奈米外加米銀上用銀若上樣米畫會灑倉頭舵諸無名費視南新倍之若倉兌一立站戶不得爲奸旗

軍無所藉口俱照南新例一體交兌前項千七百石米與處費銀兩俱可減省大半矣前件該本縣看得前項二款原有移船及扒蓋米二升四合已經申請改抵船米未蒙改減請乞詳查原文乞允行縣以便遵守再照往年船戶有淋尖插擔口食神福等米二千爬偷灑撒米二千今倉兌悉已除矣但臨兌又要無籌等費共計二千五百有零爲照往年此多費之米每兌米一石則外加增解頭耗米一斗今本縣區處每經催遞納人戶名下見米一石加米二升四合因以充本年未減旗軍移船之米再照往年每用大船錢銀二分共計五百一十餘兩今建立官倉於通縣經催遞納人戶只照米每石出銀一分共計銀二百五十餘兩改作公費兌上使用官給印簿印票發給批頭經催運米到倉照米輸納給票付經催執赴縣登簿稽考此銀僅足兌軍使費及批頭糧官飯食之用今建倉兌查照往昔船銀內已省銀二百五十餘兩釐清夙弊而船戶盡驅插和者何有焉痛削因循而兌米乾圓濕潤者可免矣乞賜查行永爲遵守

一就倉兌以便交納前件照得先年移船水兌之時民苦守候軍難勘收南新常年倉兌旗軍例子倉內受米剝運上船民固無所容其夾雜軍亦無所用其刁難今卑縣有倉已行照例交兌但縣批頭止十二名倉口窄狹不等軍旗一時領

單較集不無耽閣紛擾乞牌行該衛所輪五按單逐日挨次交兌軍止五名頭戴號巾衛所官僉名記之批頭止五名頭戴糧里頭巾身掛腰牌糧衙官僉名認之照巾識認此外有多添一人者卽係扛幫害兌之人許軍民稟究夫人少則無爭單清則米見卽糧里不得以不堪之米交軍旗軍不得以什伍之衆欺民而于中交構打點之奸亦無所容矣前項已經奉行軍民兩便伏乞批示永爲遵守

一每年修倉長便看得兌倉見今新立俱屬堅固寒暑經年不無損壞合應修葺此項費用不煩別派卽照原派某號倉房係某都某圖貯米里遞自行修葺如人家自修家倉不待

督責自然堅固每年一兌一修輪次加工費亦減省管糧衙官于未交米先逐一看驗有不堅不固希圖後替者卽行查責至於五年十年大加修蓋其餘官廳側房不係貯米之所官自設處加修不涉各糧里人戶若不係兌時間有應修蓋處守倉夫隨時開報以便查驗若守倉人侵損及倉空時容畱衙門閑雜人等入倉作踐究責修補本役革換

一議倉夫工食照得官倉旣立必得守倉夫一名前後早晚嚴行看守歲給工食七兩二錢不必別加編派亦不必重費糧里查得原買官倉外有臨街住屋五間每年貨價銀肆兩捌錢可以抵給不足卽于每年各批頭所領餘費內湊給其

倉內所置家伙什物等項一一籍記每年運兌交割管糧官逐一查驗有遺失損壞者責償若啟閉不謹或於倉米暹同經催衙門人等奸侵作弊依律申究以上奉守道王巡道張帶管糧道汪監兌俞按院方撫院夏各批允

南昌府進賢縣爲申請移船米改抵倉兌脚費懇乞批示以蘇民重困事照得軍民一體法貴均平卽如本縣兌糧正額比照南新豐三縣已多脚耗米七升有零此載之令甲不可顯減惟是先年水兌每單正副米七十八石二斗軍船移就民船原議軍內有移船二升內多扒蓋米四合共二升四合在於副米給與旗軍第查南新倉兌每單七十七石緣有出

倉入倉挑脚米之費外酌議脚夫米二升剝船米四合此其例之可鏡者且南新連界均一府屬均一倉兌若不及今申請改抵是軍無移船之勞而復收受其米軍獲兩利民有免脚剝船之費而重出移船之米民受疊累矣合以南新例批示以此二升四合改爲倉兌脚費是旗軍不過省額外之費糧里免則外之派此皆民沾實恩軍亦貼服具由申詳奉本府帖文奉分守帶管糧道王巡按方巡撫夏監兌魯各批允徵收兌米簡明告示

一兌米除應納正額外向有加增米四升出於納戶名下者已于十甲兌米內盡行革除今見年經催敢有不遵前章仍

前需索升合者許指名告究

一每額米一石公費銀一分仍出於各經催名下

一官斛訪得各經催往往俱用私斛本縣已經嚴禁盡行退出送縣當堂毀破無存隨造官斛印烙用厚鐵釘漆布包上有木鐵匠姓名責令十甲經催俱已遵行矣但今見年經催仍執十甲經催原斛送縣親自驗過轉給收米各戶驗實交兌敢仍用私斛圓桶結幫多勒者許被害人執桶首告重究一管糧官常例本縣建倉交兌屢經刊示革除今一甲兌米申委東衙管兌本縣潔已奉公常例分毫不取敢有各經催及本衙人役指稱各色科索各人戶者許諸色人首稟以憑

進賢縣志

卷四

建置

七

懲治如訪出一體申究

一批頭本縣照舊僉點十二名責令在倉收兌日用飯食使費俱于公費內動支毫無別用各經催運米到倉除正數米及公費銀外敢有不愛身家刁索各經催升米毫費者除本縣不時訪究外許被索人首告以憑重治

一兌米俱要乾圓潔淨有將不堪米強納者許稟究毋得容收

一小船戶陸續載米赴倉每米一石止許口食米一升二合船錢八釐

一保歇及堂衙一應人役有倚官需索誣騙者許諸人首告

立究

南昌府進賢縣爲懇覈兌准細則清減船兌脚耗永甦民困
事竊照進賢丁糧數寡差繁賦重極苦漕兌水運幸蒙恩庇
俯從末議允建兌倉批示遵守四年軍足民餘每歲餘米已
經清覈變價共銀一千零五十二兩七錢一分九釐申詳貯
庫留抵正賦外靜思糧從則派米從何餘餘不歸民官無實
惠案查往昔船兌官民米每石除兌准正副米外則派脚耗
米三升四合八抄五撮三圭四粟共脚耗米一千六百四十
二石二斗七升七合七勺卽今倉兌脚耗米內止用扒蓋米
一百五十六石四斗二升七合四勺八抄七撮一圭二粟每

船議單外增補潑撒米六石共用米二百七十四石六斗三
升三合六勺七抄五撮六圭二粟用下軍船脚米三百六十
六石一斗七升八合二勺三抄四撮一圭六粟又用小舢船
米四十八石六斗六升三合一勺六抄四項共用米八百四
十五石九斗二合五勺五抄六撮九圭緣因允建兌倉以來
革去大船經催自雇小船運米上倉卽回亦扣口食此宜有
贏米者一免僉解頭四十餘名止僉批頭十二名自有公費
供給未扣口食使費此宜有贏米者二對倉收受無甚潑撒
遞減多米此宜有贏米者三此米在民以爲臨正之供已輸
於官在官以爲無礙之積已貯於庫現今本縣申詳毫無謬

漏但思積餘於官雖在庫而官無支解減徵於民無虧官而民受贏餘況夫歲久弊生奸猾計出及今不爲請減定則將來持籌者萬一藉口則內之米乾沒有餘之糧小民膏脂勢歸私橐雖有兌倉之利與無倉同爲此除倉兌交軍足用及正額難移外今將水兌合減脚耗細則陳列於後伏乞立賜裁減頒則庶贏餘仍在民間倉兌恪垂永利緣係請減兌糧贏餘脚耗米事理卑縣未敢擅便擬合請詳定奪爲此一一開列并原蒙批允倉兌事規刊冊一本具中伏乞照詳施行今開

進賢縣官民米一石派兌軍正米二斗四升五合七勺四抄

進賢縣志

卷四

建置

十九

六撮一圭四粟

副米一斗三升二勺四抄五撮四圭四粟

淮安倉正米七升八合八勺七抄六撮一圭六粟

副米四升一合八勺四撮三圭六粟

以上正副二項共四斗九升六合六勺七抄二撮一圭此向來額編定則不敢請減勺合者也

原船運兌軍脚耗米二升五合八勺三抄三撮三圭四粟

淮安倉脚耗米八合二勺八抄二撮

以上二項共脚耗米三升四合八抄五撮三圭四粟通共一千六百四十二石二斗七升七合七勺此項脚耗米向

雖額編定則今自倉兌交軍有餘所宜照數減則者也

一兌倉每軍正米五十石合用扒蓋米五斗每官民一石應派米三合二勺四抄六撮六圭四粟

一每舫議單外旗軍爭補潑撒米六石每官民一石應派米五合七勺

一正副并耗米一石挑下軍船脚夫米一升五合每官民米一石應派米七合六勺

一正副并耗米一石小剝船米二合官民米一石應派米一合一抄

以上倉兌四項止該用脚耗米八百四十五石九斗二合

進賢縣志

卷四

建置

三

五勺五抄比船兌計多脚耗餘米七百九十六石三斗七升五合一勺三抄此應照則列入由票以便徵納

南昌府進賢縣爲懇覈准兌細則清減船兌脚耗永甦民兩事本縣極苦漕運允建倉兌批示遵守四年軍足民餘每歲餘米清覈變價畱抵正賦外案查往昔船兌每官民米一石脚耗米三升四合八抄卽今倉草去大船戶及多編解頭

口食浪費止用後開四款米數其餘贏米積徵在官中碍減徵於民民實受惠於萬曆三十二年六月內請詳院司道府俱各批允將准兌則內遞減合用正副耗米逐款開後一本縣官民米四萬八千一百八十一石三斗四升六合六

勺

一兌淮正米一萬一千八百四十石三斗八升副米六千二百七十五石四斗一合四勺

一淮安倉正米三千八百石三斗六升副米二千一十四石一斗九升八勺

一扒蓋米每正米五十石該米五斗共米一百五十六石四斗七合四勺每官民米一石應派米三合二勺四抄六撮二圭二粟

一每賊議單外補旗軍撥撒米六石共米二百七十四石六斗三升三合六勺七抄五撮六圭二粟每官民米一石應派

進賢縣志

卷四

建置

三

米五合七勺

一挑下軍船脚夫米每正副并加耗米一石給米一升五合共米三百六十六石一斗五升一合四勺四抄三圭四粟每官民米一石應派米七合七勺

一小船剝米每正副并加耗米一石給米二合共米四十八石七斗二升二合七勺四抄六撮五圭五粟每官民米一石應派米一合一抄

以上四項原額脚耗米一千六百四十二石三斗七升七合七勺今改倉兌減除米七百九十六石三斗六升二合四勺三抄七撮五圭實派出米八百四十五石九斗一升

五合二勺六抄二撮五圭官民米原額每石派脚耗米三升四合八抄五撮三圭四粟今減除米一升六合五勺二抄八撮四圭四粟實派米一升七合五勺五抄六撮九圭每官民米一石實通派正副耗米五斗一升四合二勺

一京米通縣減船錢銀一百兩每官民米一石減銀二釐七絲五忽五微以上縣志

熊明遇進賢縣漕倉定兌碑記

江以西賦法歲漕轉脫粟以輸太倉稟六師從河渠之便則無不漕之縣矣進賢賦粟近四萬四分其一以民漕南京軍漕復二之亦民漕於會省而交兌焉先是裝粟于舟以待漕

進賢縣志

卷四

建置

三

艘稱不便仁和寓庸黃公始建今水次倉計都選一人領運貯粟與軍交兌二十餘年矣然每歲不能無利害利害視爲政者田農淳直之民有事于漕卒無異羣羊遇狼狗拮据藉手竣役不挫產爲幸何利之有第害擇其輕則歸與老幼歌呼稱慶也乃天啟末巨璫擅國矯旨出私璫監護漕轉罔密而文峻爲政者凜凜救過不給漕卒之勢益張虎而翼矣卽南昌衛漕卒吾郡屬也家于郡其勢爲主下縣之民反爲客則擇肉其孱弱者且繕艘最後竣事獨遲彼釋耒耜而僑居省會以待漕疲于奔命矣惟廣信所漕卒爲外屬以吾縣視之其勢彼反爲客繕艘銜尾齊來竣事無時日之稽費省而

官惠向來以一艘兌吾縣惟昨午係他官假守并十艘爲何將奪去則盡兌于南昌衛民純客軍純主害得其重有挫產以償耳幸今新天子撫運誅巨璫盡撤璫之監護錢糧兵馬者民旣欣欣急公如天之福又獲借晉江蔣公鍾湖自東鄉調來名家茂齒擅才力做賦不索而完乃持牘請于治粟監司陳公九巖曰功令隨到隨兌今進粟到廣信所軍艘亦到不此之兌而復尙他艘之參差非所以一法令示民信也陳公奮然曰可哉而郡太守彭公觀民監漕理沈公鍾岐並愆慝出一口于是盡進粟二萬四千悉兌廣信軍艘四十有六不十日而竣矣粟無蒸浥雀鼠之耗凡足輸軍官復革其餘糶

之陋無害可擇公私太悅而舒文學偕里父老介余子侄輩聚族而叩曰微仁侯之惠不及此曷碑而記諸使自是歲歲令進民與廣信漕卒交兌有四懿焉耳目馴習誼誼不生一也艘至早兌省僑寓飲食二也米無蒸浥不挫產以償三也餘糶盡革官有清譽民無苦科四也熊子聞而善之曰懿哉爲政之良非能家賜而人益之也調之而無它愁擾因軍民之剛柔燥濕而先後其劑焉是君子不費之惠乎夫害莫大於求利而利莫大于無害向年怵于轉漕之害重輒倩豪猾猾禍人與軍闌擇輕害爲幸今并輕害而無之歸而與主伯亞旅宣力南畝嗣歲父老子弟領運者視今率爲成法五尺

童子借箸爲籌莫之或欺異時爲政於吾郡吾邑者矜式今年郡邑諸君子成法尚望其遊意於法外爲惠於法內忍變法耶豈非吾邑百年之利哉是可以記矣蔣公名德堦晉江人乙丑進士始終監護有勞者則主簿沈一匡也

常豐倉在縣治南來撫門內嘉靖初知縣胡斐重建此官府積穀倉 便民倉在縣治北城外烏石山下嘉靖甲申知縣吳大本建此收東西南三鄉兌米倉 三陽倉縣治北六十里三陽潭水次爲兌淮米設 土坊倉縣治西五十里卽土坊鋪爲便儲西鄉兌淮米設嘉靖戊申知縣周美建 東鄉倉池溪橋舊翁家嶺鋪萬厯間知縣王亮改于潤安題曰潤安便民倉 西

進賢縣志

卷四

建置

十四

鄉倉在二都藍田 南鄉倉在十二都臧溪 北鄉倉在八都白岐山以上八倉自知縣黃汝亨改省兌倉後俱裁 縣志

邑人萬福常豐倉記邑預積貯備荒也倉以常豐名志有也進賢故倉五南北久廢東傾頽過半西僅存值兵歉寡哀常豐亦淪廢焉侯來泣茲邑首重民命往視倉嘆曰豐凶數之常儲積令之責弗厚其積曷備其凶矧倉阻城外脫有急則中外戒嚴適爲敵資吾何利用是謀併之會大叅嚴公來按縣嘉侯議焉遂助贖金成厥美迺正德辛巳秋七月爰徙東西併入城中同衆志也不費公帑以糜民財捐已俸也密其茨覆崇其垣墉垂經久也左右對峙鱗次翼張廣儲蓄也

事高明簷楹深邃使出納也嘉靖始元六月告成邑人咸
先視之老者駭其崇稚者誇其壯守者喜其完輸者樂其便
且邇也先期遴董厥事者老黃貴徵予文以紀予惟傳說曰
有備斯無患管子曰倉廩實而知禮節侯侯其有焉噫侯之善
政奚翅此哉利民祈報新厥廟也便民通濟葺厥橋也固民
保障石厥城也皆侯愛民之志之緒也召杜父母何忝哉是
用勒石以垂不朽云侯胡姓名斐字時章浙之金華湯溪人
登正德甲戌第居是以文學政事名

邑人萬鏗便民倉記邑大夫南峰吳侯蒞任之明年爲嘉靖
甲申其夏四月始作倉於縣北關外里許石龜坑之陽父老

有過予者曰便矣哉此倉也問之故則曰縣北六十餘里三
陽水次有倉焉直下鄉居民便耳此倉之設上鄉其胥便乎
旣而倉成侯日臨視之槩量以平納受無滯章程畫一罔敢
撓則又謹曰倉誠便哉糧之旣入矣晒糧有場焉藉於地有
木若板焉左不百步有通河焉可以免濕爛之虞可以眞達
交兌之所司納者則又稱曰此倉寧獨爲輸者設哉倉之地
固於養濟院故基其材木取之集善諸廢寺故料而一切雜
費咸出綜畫民罔聞之則又曰侯不欲擾我而遺我以便一
至此哉予聞而私念之以爲始之言便者統其大也再三舉
其詳也終焉所謂便之使者也侯先立於其大者則諸便從

之矣必若名倉其便民乎一口侯語次及倉予述以告會侯
白事會城巡撫中吳盛公問倉名云何侯舉余言以對公亟
贊之及諸當道褒許無異詞於以見豈弟君子一念爲民之
誠獲上信下其響應固若此哉侯今以風憲檄徵矣邑倅嘉
禾顧君傳謁予以記予固倉中之一便民也誼焉辭乃諭於
衆曰爾等昔言倉之所便者至矣復何進焉然亦知夫此又
有便者乎夫糧儲爲國家命脈而實資之於民民旣便也則
歲運可充京儲有濟斯不亦便國矣乎衆曰然予又曰倉以
便民而國因之便固矣亦知夫有不便者乎衆聳然以思予
曰昔惟三陽倉歲委之寮屬耳今得省監視之勞避繩察之

怨或因而交征爲利者亦有之今則勞矣且任怨矣利源塞
矣於身圖奚便焉惟侯不徒使其身故爾民有此倉之便也
且侯之不自奉自佚自遂自賢以求便爾民者豈值倉哉茲
特其可見者若甘棠峴碑然耳衆咸謝曰懿哉探本之論非
吾儕所及也相率以復於顧君君謂予曰吾聞之爲政者其
上便民其次便國其下便身先生之言匪倉斯記所以詔吾
人者切矣繼自今寧無觀倉興思時其修葺以永永其便者
乎請遂勒之昭示無斃倉爲厥十三間均若一倉之中稍後
爲廳事又後爲退居其前爲大門間各視厥之數繚以周垣
丈計之百有二十其夏六月辛丑落成距始事日周甲子而

僅加五也侯名大本字性夫正德辛巳進士爲宣城望族南峰其別號云

邑人雷夢麟潤安便民倉記臨海王公治進邑凡事之便於民者亟舉之民咸俟志焉有二十二都于希孔者議立倉於潤安都之人稱便上其議於司府皆稱便乃因古社學遺址環以墻中爲公廳前爲門左右爲倉里各用其一而裕也倉成民以時輸而自運焉旣不失公家之賦又以餘餉守者而足也噫便矣哉請於公命之曰潤安便民倉書足國裕民於廳語曰百姓足君孰與不足故足國者先裕民裕民者先便之仁人之言有本哉愚生長茲土願言其所以便按舊規凡

兌軍米皆貯三陽倉以蒞其地在縣之北七十里以水所會舟車所通也然民之附於郭散處於東西南之各鄉者或踰百里而輸或踰七十里而輸東越軍湖西浮白沙茫然萬頃其勢不得速達而督責之苦催饋之勞交剝守候泥溺之費無紀矣其後宣城吳公立倉於縣北關附郭以南之民便焉崑山周公立倉於土坊西之民便焉獨東無以立者民不便甚則告而自立在十六都則迴龍溪在二十二都則今潤安皆得併力自運他無所擾焉視官所立倉尤爲便矣蓋民之所立若已有之立之不苟且修之不忘緩無傾圯之患焉倉之所在相去不數里朝至而朝輸之暮至而暮輸之輕車熟

道風雨不廢無險阻之患焉且一鄉之中十年之內征輸相代彼不得少負此不得多取卽有逃亡業之所屬舉相知也無逋賄之患焉民自輸之民自運之不越都而代焉多者主之少者副之不偶語而足焉卽有所費皆爲己出且眾擊易舉也無虧累之患焉上不煩於審編下不容於營脫歲之所值各蚤計之卽有奸頑鄉之公評不可昧也無規避之患焉愚故述而紀之俾後之爲治不失公之意焉則民之便也永矣噫十六都便矣而十五都則遠者愚以爲附迴龍溪便二十二都便矣而十七都十八都則又遠者愚以爲附潤安便而民莫以告者無于希孔若人者之倡義也姑書此以俟

進賢縣志

卷四

建置

三

戊戌補刻

漕倉兌米埠頭 在省城進賢漕倉前左邊直下抵河嘉慶八年邑人十六都林元清捐貲價買靖安縣鄭正廷店基公眾釐石砌成永爲合邑泊船兌米公路其基地契載前橫一丈三尺後橫一丈四尺東至謝店西至劉店南至河北至官街價貳百

壹拾文契存林姓